



Sud Bosne i Hercegovine
Sud Bosne i Hecegovine

Broj: S1 3 Iž 037919 20 Iž
Sarajevo, 22.10.2020. godine

Sud Bosne i Hercegovine, u vijeću Apelacionog odijeljenja sastavljenom od sudija Dinke Bešlagić-Čovrk kao predsjednika vijeća, Srete Crnjak i Vesne Trifunović kao članova vijeća, odlučujući o žalbi Nade Pepić, Svetosavska 3, Vlasenica, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020.godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020.godine, u nejavnoj sjednici, održanoj dana 22.10.2020.godine, donio je

R J E Š E N J E

Žalba se odbacuje

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što ista nema pravo glasa jer se radi o umrloj osobi.

Sa e-mail adrese Siniše Kovačevića je dostavljena žalba, u ime Nade Pepić na odluku Centralne izborne komisije BiH broj: 05-1-07-1-998/20 od 01.10.2020. godine, u kojoj navodi da se uredno prijavila za glasanje izvan BiH ali je odlukom Centralne izbome komisije BiH skinuta sa spiska glasača, te moli da glasa na adresi navedenoj u obrascu prijave.

Centralna izborna komisija Bosne i Hercegovine u odgovoru na žalbu predlaže da se žalba odbaci kao nedopuštena, odnosno da se odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da je ista nedopuštena.

Naime, po shvatanju ovog apelacionog vijeća, žalba podnesena u ime Nade Pepić, o čijoj prijavi za glasanje izvan Bosne i Hercegovine je odlučeno spornom odlukom, podnijetoj putem e- maila, sa e mail adrese Siniše Kovačevića bez njene punomoći i bez potpisa na samoj žalbi, se ne može tretirati kao dozvoljena i izjavljena od ovlaštenog lica. Potrebno je napomenuti da i u slučaju da je žalba dozvoljena, ista bi morala biti odbijena, s obzirom da iz stanja spisa proizlazi da je Centralna izborna komisija BiH prije donošenja pobijane odluke, provjerom i uvidom u službene evidencije, utvrdila da Nada Pepić nema pravo glasa jer se radi o umrloj osobi.

Kako je žalba izjavljena od neovlaštenog lica, u smislu odredbe člana 180. stav 3. Zakona o parničnom postupku pred Sudom BiH („Službeni glasnik BiH“ broj: 36/04, 84/07 i 58/13), to je istu, analognom primjenom člana 191. stav 1. tačka 1. citiranog zakona, a koji se primjenjuje temeljem odredbe člana 60.a) Zakona o upravnim sporovima Bosne i Hercegovine („Službeni glasnik BiH“, broj: 19/02 do 74/10), valjalo odbaciti kao nedopuštenu.

**PREDSJEDNIK VIJEĆA
S U D I J A**

Dinka Bešlagić-Čovrk